



Komunikado di prensa

1 di mart 2024

CAft: "Utilisá e momentum aki pa hasi ekonomia mas robusto"

Oranjestad – Ekonomia di Aruba ta kresiendo di forma próspero. E finansa públiko tambe ta muestra un imágen positivo. Importante ta pa Aruba usa e posishon finansiero aktual pa drecha finansa públiko strukturalmente i pa hasi e ekonomia mas robusto. Den e kuadro aki, un maneho presupuestario prudente ta sigui di e mésun importansia, konsiderando e gastunan di interes haltu. Reformanan struktural den e área di seguridat sosial i merkado laboral lo krea mas resiliensia.

Redukshon di debe

E presupuesto pa 2024 a keda aprobá na tempu, i tantu pa 2024 komo multianualmente e ta kumpli ku e norma presupuestario sentral kual ta un surplus di por lo ménos 1 porshento di e produkto interno bruto (pib). Sinembargo, tin riesgo tambe. E gastunan di interes, ku na e momentunan aki ya kaba ta asendé na kasi un kinta parti di e presupuesto, por sigui subi debí na e tarea di refinansiamentu den e añanan benidero. Esaki ta pone ku awor mas ku nunca nan ta primi riba otro gastunan òf invershonnan. P'esei ta importante pa hasi pago pa amortisashon di debe.

Invershonnan

Invershonnan ta nesario pa krea un ekonomia mas robusto i pa inkrementá e kapasidat di generá ingresonan. Den e marko aki, CAft ta konsiderá ku e oumento proyektá di e invershonnan te AWG 115 mion na 2028 ta algu positivo. Pa garantisá e efektividat di e invershonnan aki, ta importante pa elaborá un agenda di invershon multianual, vinkulá na e metanan di maneho, inkluyendo esnan di e Pakete Nashonal.

Reformanan

Ku e espasio presupuestario ku tin tantu serka pais komo serka e fondonan sosial, awor ta e momentu adekuá pa implementá reformanan nesario ku ta fortalese ekonomia. Den kuido ta tumando pasonan konkreto pa yega na un kontròl struktural di e gastunan di kuido. En prinsipio, CAft ta konsiderá ku un marko di gastunan komo instrumento di maneho ta algu positivo, kon tal ku esaki efektivamente ta sirbi pa redusí e gastunan di kuido.

Pa seguridat sosial – hustamente awor ku e posishon di salida di e fondonan ta favorabel – Aruba lo por konsiderá reformanan ku ta laga e merkado laboral bira mas dinámiko tambe. E luho ku Aruba tin awor aki, ta ku e por implementá reformanan sin ku esakinan nesariamente ta kousa un oumento di preshon di e gastunan.

Riba tereno fiskal, na 2023 Aruba a pone un promé paso pa krea un sistema di impuesto mas robusto. Sinembargo, e sistema di impuestonan indirekto te ainda ta fragmentá, loke ta hasié inesesariamente kompliká. Un sistema mas simpel, den forma di un impuesto riba balor añadí (btw) ta rekomendabel i lo benefisiá kumplimentu ku pago di impuesto (*compliance*).

[Fin di komunikado di prensa]



Fotógrafo:

Eric Boeldak

Deskripshon di potrèt:

CAft ta konsiderá ku un marko di gastunan komo instrumento di maneho ta algu positivo, kon tal ku esaki efektivamente ta sirbi pa moderá e gastunan di kuido.

Nota pa e redakshon– no publiká

Persona di kontakto di CAft:

Sekretariado di Kolegio di supervishon finansiero Aruba

Telefòn +5999 511-8391 / +5999 461-9082 / +5999 461-9084

Koreo elektróniko info@cft.cw

Wèpsait www.cft.cw

Kontaktonan di prensa:

Jefka Alberto

Telefòn +5999 512-6861